


BAKURUBASANNI

(nimero 12 songo)

Mali kono = Dōrōme 300

Afriki kono = Dōrōme 600


Jamana were = Dōrōme 1000



Zuluyekalo san 2006

Kunnafoniseben bota kalo o kalo. BP: 24 Telefoni : 221-21-04. Bosola Bamako-Mali. San 34nan boko 414nan. A songo : dōrōme 15

Itali ye mōnjali 2006 kupu ta



Nansarala kupu min bë wele Ero, Faransi ye Itali gosi o san 2000 ta la k'o kupu ta. Nka mōnjali tako 18nan min tēmēna an kōrō zuluyekalo tile 9, Itali ye tajurusarabere da Faransi kun k'o kupu ta. Itali ntolatantōn bë wele Sikuwadara Azura, ntolatan kuntaala bannen kō ka mōñobō daminé karitō bilenman jirala Zinedini Zidani na k'a gen ka bō ntolatankēne kan, sanga 110nan waati. O ye Faransi ntolatannawtōtō mōgo 10ye. Ntolatan kuncera 1 ni 1 na. Mariko Materazi min bë ntola tan Entéri Milan na Itali, o ye Zidani ka kuru donnen jibō sanga 19nan na. Zidani ye Faransi ka kuru don penaliti la sanga 7nan na. Ntolatan in labanna Itali ka 5, Faransi ka 3 la penalitiw la.

Ninye Itali sijē 4nanye kupudimondi tali la : San 1934; 1938, 1982 ani 2006. Wa nin fana y'a sijē filanan ye kupudimondi ka laban penalititan na. A fōlō kéra san 1990, Itali ni Berezili ni nōgōn cë. O dà tora Itali la. Berezili ye kupudimondi ta sijē duuru : san 1958; 1962, 1970; 1990 ani 2002. Sibiridon zuluyekalo tile 8 san 2006, Alimanji ye Pōrtigali gosi 3 ni 1, ka jōyōrō 3nan ta.

Solomani Bobo Tunkara
Dokala Yusufu Jara

Goferenaman ni Kidali mara mōgo murutilenw bennna fō la Alize

J amana kōñokow ni marabolow minisiri Zeneral Kafuguna Kōne ye goferenaman ni Kidali mōgo murutilenw bennmakansében don jamanatigi Amadu Tumani Ture bolo Kuluba, Jumadon zuluyekalo tile 7 san 2006. Tegeno bilala bennkanseben in na zuluyekalo tile 4 Mali goferenaman ni Kidali ni Menaka sorodasi murutilenw fe. Jamanakuntigi tun ye Zeneral Kafuguna Kōne ci Alize, n'o ye Alizeri faaba ye, o sigikafō in na. A ni mōgo minnu taara o baara in na olu tun ye : Mali polisiw jateminebaa Mahamadu Jaguraga; ale tun ye Mali kōrōnyanfan polisiw nēmōgo ye, a kéra Mali ka kōrōsigi fana ye Tamaniraseti, Alizeri jamana na. Koloneli Menkōrō Kané, o ye lakana ni sorodasi kōrōw ka minisiri baarakēnōgōn ye, ka fara Baba Mahamani Mayiga kan, o ye laadibaa ye jamana kōñokow ni marabolow minisiriso la : Mali kōrōnyanfan polisiw nēmōgo dankan kōrō don.

Jamanakuntigi Amadu Tumani Ture kelen ka bennkanseben soro, o

y'a jira ko «An bë lafiya de jini jamana in ka taa nē walasa dō ka fara an ka bēejefanga barika kan ani k'an denw ladamu. Fo mōgōw ka da a la ko kélé kofé, bennkan numan tē yen; bennkan jugu fana ka fisa kélé ye. Diñé na, fosi tē nē bila ka jamana yamaruya ka kē badenkélé kan; sabula nafa t'a la. Nin hakillila ninnu de ye ne sōn mōgo murutilenw fe sigikafō ma.»

Bennkanseben in kōñok
kunbabaw file :

Walasa kōrōñemōgōw sen ka don u yērew kunkankow nēnaboli la:

1 - Jékulu kérénkérennen dō sigili sen kan kōrōnyanfan tōgō la, min bēna a janto bennkan baaraw la yanni waati cë.

2 - O mōgōw bë bō fan fila fe ni sigikafō nōgōyabaa ka dēmē ye.

3 - Minisiri min nēsinnen bë jamana kōñokow ni marabolow ma, o b'olu yamaruya ka baara kē san 1 kuntaala kōñ.

4 - Ni jékulu kérénkérennen in ka san 1 sarati dafara, a ka baara bë latēmē Kidali marabolo nēmōgoyaso ma,

A tō bë nē 2nan na

Mali depite w rāy	nē3
Koroboro langa w rāy	nē4 ani nē5
Koroborlanga s	nē5
Dukene 26 ani 27	nē8
Kalankene n	nē8
Norwezijamata	nē10
Maliden dōw mōgn	nē11
Zan Faransi	nē12

Kunnafoniw

n'o ye «asanbile erezonal» ye.

5 - Jekulu sigita in jecci :

Fanga min b'a kunna, a b'a sinsin o kan porozew naniya sirili la sariyakow ni fen werew la ka jesin Kidali mara ma.

A b'a sen don politiki taasira numan jiidili la ni do farali ye kominiw konoemogow ni mara konoemogow sekow kan jamana sariyaw labatoli kono.

A be marabolo nemogoyaso senkoromadon o sekow la nin sira ninnu fe :

Jekabaara sinsinni ni nafolotigw ye, sor, hadamadenya ani seko ni dønko sabatili la Kidali mara kono, ka keje ni pakitinasionali sariyasen 32nan ye.

Sor, hadamadenya ani seko ni dønko sabatili :

1 - Laje do keli Kidali ka baara do boloda ka jesin sor, hadamadenya ani seko ni dønko sabatili ma. O be dabo baganmara, ji minta soroli, bolifenko, negejurusirako ni arajosoko kenyako, ladamuko, seko ni dønko, bololafendilan ani dugujukorofenw boli kama;

2 - Fanga seginni sennateliya kominiwemogow ma;

3 - Baarako la, ka cakeda fitinlw ni mankanw dayel, ka juru nini ka don mogow la ani k'olu kalan warije labaarali la.

4 - Benkansében min be Mali ni jamana minnu be danbo, olu maraw ni nogn ce, o baaraketaw ka farafasiya ani ka waleya;

5 - Kenyasira do sigili sen kan mogow ye, minnu te sigi yoronin kelen;

6 - Baara do bolodali ji saniman soroli la Kidali kono ani Kidali mara yoro nñnama bee la;

7 - Baarakeminenko ni negejurusirako :

- Gitron dali nin sira ninnu na : Kidali ni gawo furance ani Menaka ni Alizeri dance;

- Tesaliti pankurunjinkene Iakurayali ;

- Kur'an donni Kidali mara serekili bee duguba kono ani u

kominiw faabaw;

- Telefoni laseli serekiliw ni

kominiw faabaw la;

- Arajosoba bolofara do sigili

Kidali mara la ani ka teliwisoñsoba bolofara do sigi Kidali kono min b'a to u be se k'u ka seko ni dønko don ba la, k'u ka mogow cogoya jira marakonemogow bee la, k'o telewisoñ baaraketaw kalan u ka baara kecogo numan na ani ka lere 1 nognna ke don o don Kidali mara kunnafoni n'a jaw boli la arajosoba ni tele la;

8 - Ka nininibaaraw boloda ka jesin dugukolo nafamafenw boli ma.

9 - Kalan kecogo feere do sigili sen kan Kidali mara hadamadenya, a seko ni dønko ani a ka diine sankorotali kama; kalanden jolen minnu mana «Baki» sor Kidali mara kono, k'olu yamaruya ka taa u ka kalan to ke jamana were la;

10 - Baara do bolodali ka jesin arabukankalannaw ma ni do farali ye u ka dønniya kan ani ka baaradegekalan ke u kun;

11 - Pakitimasionali la, san 10 min tun dira u ma k'a jira k'u te nisongo ni wusuru bere sara, san 10 were farali o kuntaala kan walasa halisa mogow caman ka taa u ka cakedaw sigi Mali koryyanfan fe.

Basigi sabatili teliya la :

1 - Jekulu kerénkerénen sigili Kidali mara kono benkan baaraw topotoli kama.

2 - Sorodasikanw yelemani duguw kókan o ka waleya; sabula ben tun kera o kan kabini pakiti nasionali la;

3 - Marifaw ni mugu ni kesew ani fen o fen tara Kidali, Menaka ani Tesaliti mekal tile 23 san 2006, segin ka ke n'olu ye sigikaf nñgoyabaa nena; i n'a fo benkan in b'a jira cogo min na.

Basigi sabatijekulu

kerénkerénen :

4 - Ka basigi sabatijekulu kerénkerénen døw sigi sen kan Kidali dugu kókan minnu bëna semé mara in lakanasorodasijekulu la, a sorodasi fanba be ke Kidali marakonemogow ye minnu ka baara

be jesin basigi sabatili ma kerénkerénenya la.

Sariya min ben'u sigili yamaruya, o b'o sorodasijekulu sigita, u sorodasi hake, maramafen hake, u sigiyorow ani u ka baaraketaw danatige.

Kerénkerénenya la, sorodasijekulu ninnu ka baara be jesin :

- faso ka yorow lakanani n'u kolosili

- mogobaw lakanani

- lakodønni ni munumunusaalo

Kidali mara kono

- polisi minnu ni kiiritigelaw be baara ke, k'olu deme u ka baara la

- Kelew keli

- ani baara fen o fen mara bugunnatige u sigilisèben kono.

Basigi sabatijekulu kerénkerénenya ka baara te ke kunfetoko ye; u ni faso ka lakanabaaw be nogn dafa lakanani hukumu kono, u be semé Kidali mara lakanasorodasi la.


U ka baaratigi ye Kidali maranemogow (goférereni) ye; u be baara ke o ka yamaruya kono. U ni jamana lakanabaaw (garadiw) bëna siri nogn na.

Jalatigiba were minnu ye yoro bila ka taa u senfe, olu be se ka ke basigi sabatijekulu kerénkerénen mogow ye.

Ni basigi sabatijekulu kerénkerénen némogó kera sorodasi taalenw na némogó do ye, a dankan be ke faso ka lakanajekulu suguya bee mogó ye; walima ni jekulu némogó kera faso ka lakanajekulu suguya bee mogó ye, a dankan be ke bolilenw na némogó do ye.

Basigi sabatijekulu kerénkerénen mogó to be dafa ni sorodasi ni lakanabaa werew ye. Mogow ni minenw be bila o jekulu ninnu némogó ka bolo kan ka keje ni kulu kelenna mogó n'a minen hake ye; o be nénabó lakananéjekulu fe, benkansében topotijekulu ladonnianen kofe.

Jekulu minnu bëna sigi, cakeda kerénkerénen bëna bila u togo la, min ben'a janto u mako misenninw nénaboli la.



Zenerali Kafuguna Koné ye bénkan sèben don Jamanakuntigi bolo

Don min mana da jamana kónokow ni marabolow minisiri fε, lakana nédonjekulu ka lajini kóno, bénkansében tópotjekulu ladonnianen kóro kofε, mogo minnu bëna ta basigi sabatijekulu kérénkérénnenw na, baaradegekalan bε k'olu kun.

O kalankejoro bε dantigé jamana kónokow ni marabolow minisiri fε ni lakana nédonjekulu y'a lajini ke.

O yéor in fana bε kε mogo bolilenu dalajeyoro ye. A bε to lakana nédonjekulu ka kolosili kóno.

Minenw, mugu ni kisew ani maramafé talenw laseginni bε kε o dalajeyoro in kóno. Mogo minnu kofora basigi sabatijekulu némogoya la, olu bε sugandi yen ani k'o kankonómogow ka hadamadenya n'u ka baarakow nénabó o yorónin kelen bée la.

5 - Sorodasi jalatigiw, jalatigi dankanw ani jalantanw kunko nénaboli ji némajolen na; olu minnu y'u ka kanw bila mékalo tile 23 san 2006 ka taa u senfε. Ka olu ta basigi sabatijekulu kérénkérénnenw na n'o bε se ka ke, ani k'u ka sèbenkow, warikow ni jalakow nénabó ani k'u fara lafiya ninibaaw kan.

6 - Kidali mara mogo kalannenbaw sendonni jamana labaarali la, ka do fara o fanga kan sira bée lajelen fε, walasa bée ka damakéne Maliko la i n'a fo pakiti nasiyonali y'a jira cogo min na.

7 - Mogo wére minnu y'u sigida bila, ka nafolo bila olu ka bolo kan, walasa u na se ka segin ka n'u banban u ka hamadenya ni soro sinsinni na. Kérénkérénnya la denmisén minnu y'u sigida bila mékalo tile 23 san 2006, a ko ka fólo olu la; nka Kidali mara mogo tòw kana bila bolo kofε. Nin ko si kána ke bénkansében tópotjekulu ninéma. O jekulu in feta bε jini kosebe mogo tata la ka bila o warimugu kunna;

8 - Kidali bε kofε baarakénafolo bolodali n'a labaarali la; ka jatemine k'o la kosebe.

9 - Ka baaradegekalanyoro dayele k'u labaaracogow dantigé.

Bénkansében tópotjekogo :

Bénkansében bëna tópotjekulu fε, min bëna a hakili to lajini kelenw waleyali la.

A mogo bëna ke goferenaman, jekulu min bëna sigi Kidali mara tógo la ani sigikafó nögoyabaa.

Dokala Yusufu Jara

Mali depitebulon jenna ni Alize bénkansében ye

Lere tan ni kelen kuma kofε Alize bénkansében kónokow kan, Mali depitebulon jenna ni bénkansében in ye alamisadon zuluyekalo tile 20 san 2006. Jamana kónoko ni marabolow minisiri Zentrali Kafuguna Kóné fóloka ka négoliw ke, ani ka depitew ka nininkaliw jaabi bénkansében in kunkan. Cakeda fitininw ni mankanw minisiri ani goferenaman ka kumalasela Usumani Camu de tun dara Zentrali Kafuguna Kóné kan ka taa négoli ke depitew ye.

Depitebulon ka kolosili la, fén minnu kofolé bε Alize bénkansében kóno, olu ye «pakiti nasiyonali» kónoko ye. O min tégenobilala goferenaman ni mogo murutilenw ce kabini san 1992 awirilikalo tile 11, lafiya donni na Mali körönyanfan fε. O de koson a bε jamanakuntigi ni goferenaman fo Alize bénkansében tégenobilali la ka nésin jamana kelenya sabatili ma; ani a y'a jira k'a bëna a sekó ke a waleyali la.

Mali politikiton bée jenna ni Alize bénkansében in tégenobilali ye fo «RPM» ni «RDT».

«RPM» y'a fo a mèenwa, ko bénkansében in t'ale feko ye, wa hali ni depitebulon jenna n'a ye bi, RPM ni RDT depitew sen t'a la.

«RPM» ni «RDT» bolo, sèben in ma tégenobila ni malidenw jemakan ye, sabula a kécogo ma bén, béejefanga hukumu kóno. RPM ka jate la, «pakiti nasiyonali» dörön de bε se ka lafiya na Mali körönyanfan fε ani ka jamanadenw bén fén kelen kan. Politikiton fila in y'a jira ko Alize bénkansében te mogo sinsinyoro bo, lafiya donni na jamana körönyanfan fε.

Alayi Lamu
Dokala Yusufu Jara

Koroborofanga

Fanga jujon ka se Soni Ali Beri tile ma

Farafinna tilebinyanfan fe, koroborjamana kera jamanaba sabananye Wagaduani Mandenkofo. Bajoliba jurukun bese tun be koroborjamana kono ka teme Jene fe fo Dendi, Name ni kejeka ce.

An tun y'a fo Kankun Musa taalen Gwo a seginna ni Gwo faama denke fila, Ali Kolen n'a dogoke Suleymani Nari ye, ka n'u ke jon ye a kerefe Name.

Kankun Musa fatulen ni Makan fole sigira a no na Manden fanga na, o ye fanga bololatigemine. O senfe, Ali n'a dogoke bolila ka segin Gwo san 1335 la. O Ali Kolen sigira fanga na Gwo, koroborow y'u yere ta ka bo Manden fanga kono. Ali n'a bonsorw ye san 150 ke Gwo fanga na. Nka mogow ye min lakodon kosebe Ali bonsorw na, o ye Soni Ali Beri ye.

Koroborjamana sanni Soni Ali Beri ka fanga ta : Kabini lawale la, Bajoliba jurukun sigibaawtunye Gow, Gabibiw ani Sorokow ye. Gow tun ye donsowy, Gabibiw tun ye senekelaw ye, Sorokow tun ye monnikelaw ye.

Soroko ninnu labanna ka Gow ni Gabibiw kelle k'u minfe, ka jamananin sigi u yere ye min welela Kukiyajamana. San 1700 waati la, Kukiyajamana sebekoro yiriwara, Bajoliba jurukun bese tun don ka taa a bila Dendi ni Tilaberi la. A jamanatigi tun ye Faran Makan Botye ye. Sorokojamana in faaba togo tun ye Kukiy fana ye. Jago tun yiriwalenba don a kono; nka ka Jaw to fanga na Gwo, olu ka mara ye Kukiy jamana koori san 800 waati la..


Ja ninnu buruju bora Beriberiw la; u labanna ka Kukiy fanga minfe a tigil la. Lakaliliwla, larabu faamaden fila minnu tun y'u yere wele Ja, o mogow kelenw de ye Kukiy minfe. Sanni san 1000 be dafa, Ja ninnu ye jamana bonya k'a ta Bajoliba kono na ka se Gwo; u nemogo Ja Kosoyi donnen silameya la, a ye jamana faaba bo Kukiy k'a yelema Gwo.

Dawula min tun be Gwo jamana naowaati, okeleya ye Mandenfaama mine. San 1325, Saga Mandiya min tun ye Kankun Musa ka kellekuntigi ye, o ye Gwo minfe ka fara Manden kan. Ja Asiboyi min tun ye Gwo faama ye, Kankun Musa y'o den fila

be wele «Koyi», olu tun be jate gofereneriw ye. Dugumakelecew ni sokankelcew tun b'u la. Sokankelcew nemogoya tun be Daali yere bolo. Jikankelecew nemogoya tun be Hikoyi bolo.

Soni Ali Beri ka kelle kelenw :

Soni Ali Beri ye kelle fen o fen ke, a y'a bese sebaaya sor. Koroborjamana ye fanga sor ka bonya ka ale de sababu la. A ye jaramaw, surakaw, fulaw, bosow ani bamananw bese



Ali kolen n'a dogoke Suleymani Nari minnu ke jon ye, olu soseginnen ko, san 1337, Ali ye Gwo fanga minfe a binake Ja Baba la, sabula o tun be disongo sara Manden ye. Soni fangako sigira sen kan Ali Kolen de fe. A bonsor kera Ma Dowo, Suleymani Dama ani Soni Ali Beri ye.

Soni Ali Beri tile

Soni Ali Beri min ye Ma Dowo den ye, o sigira koroborofanga na a binake Sori Suleymani Daman no na san 1464 na;

Soni Ali Beri n'a ka kellebolo :

Soni Ali Beri tun ye kellece farin ye min tun ka kegun kosebe. Kirakanubaa tun te, soma kogolen tun don. O de koson bese tun b'a wele «Daali», n'o ye setigi masa ye. Soni Ali Beri jena, silamediine te dower ye politiki doron ko. A ka kellebolo tun tila - tilalen don kuluw ye, k'u kuntigiyaw di mogow ma, minnu tun

mara a tile la.

Tumutu min tun lakodonnen be kosebe silameya, jago ani kodon na; Mohamedi Nadi tun y'a faama ye. Suraka bilen minnu be wele burudamew, olu ye Tumutu minfe k'a bo Manden ka mara kono. Soni Ali Beri ye Tumutu minfe burudamew na san 1468 zanwuyekalo tile 30; ka laban k'a nesin kejekayanfan ma, ka Beriberiw fana ka jamana minfe u la.

Soni Ali Beri ye worodugu magen ka na daga sigi Jene dala. A ni Jenekaw ye san 7 nogaonna ke kelle la; san 1479, a y'olu minfe. A ye Masina minfe ka jamana kura sigi k'o togo da Tendirima.

Guruma kono na, Soni Ali Beri ni mosiw kera nogaona Koriyanze fala kono : a y'olu minfe. Koriyanze ni Duwazan ye balima ce fila ka dugu sigilenw ye : Koro Nci ani Dogo Zan; ka laban ka dogonow kelleli damine olu ka kulu sanfe.

San 1488, Soni Ali Béri koseginna Gawo; sabula a tun y'a men ko Masina murutira, koburudamew fana be to ka na bin Tumutu kan. A koseginsan kelen Gawo ka bo Guruma keler la, a ye Masina mogo murutilenw keler k'u tige ka tasuma

da burudamew fana tege.

Soni Ali Béri ka baara kelenw :

Soni Ali Béri ka keler kera sababu ye, a ka jamanaba sigi sen kan min bonya tun b'a ta Bajolibá jurukun fe ka teme Gawo woroduguyanfan fe fo Jene. Jamana were minnu tun b'a ka

mara kono, olu tun ye burudamew ka jamana, Masina, Guruma, Tendirima ani dogonjamana ni mosijamana fan kelen. Soni Ali Béri tile la, a ye sen sabatibaara caman ke; n'o ye digiw dilanni ani kanari senni damineni ye, ka bo Arazelima ka taa walata.

Koroborofanga sannayelenni Asikiya tile la

Koroborofanga sannayelenna san 1600 kono na Asikiyaw bolo, kerenkerennenya la Asikiya Mohamedi tile la (1493-1528) ani Asikiya Dawudi tile la (1549-1582). Jamana sebekoro bonyana o waatiw la ani k'a fanga sinsin.

Asikiya Mohamedi :

Soni Ali Béri fatulen san 1492 la, a denke Soni Bakari Da sigira a no na koroborofanga na san 1493 zanwuyekalo tile 20. Nka ale ma meen fanga la; sabula a fa ka farinya kojugu koson, mogow siranna Soni Bakari kana na ke o nogonna ye. O de koson, u y'a keler k'a gen ka bo fanga na ka Soni Ali Béri ka keler kuntigi Mohamedi Ture sigi a no na k'o togo da Asikiya Mohamedi. O tun y'a soro Mohamedi yere ye jama lamuruti kaban, u k'u ban Soni bakari Da ka fanga ma.

Asikiya Mohamedi be sigi koroborofanga na tuma min na, a si hake tun be san 50 la; silameba hakilima tun don. A ye silamedine k'a taabolo ye, ka diinejemogow k'a baarakemogonw ye; kasoro Soni Ali Béri ka baara tun ye olu dajili ye jamana kono.

San 1486 la, Asikiya Mohamedi Ture taara hiji dakabanako ke, i n'a fo Kankun Musa y'a ke cogoya min na. A seginna ni Sudanjamana kalifaya ye. Sudan ye Mali togo koro ye kabini lawale la larabuw fe. A ka soro ka jahadikeler damine.

Koroborofanga bonyani :

Asikiya Mohamedi ye Manden keler ka Manden faamadenw mine ka taa u ke jow ye Gawo a kerefe. Aw hakili b'a la Mansa Musa fana bole hiji la Makan, o fana tun ye Gawo faama den fila mine ka taa olu ke jow ye a kerefe Nani,

Mandenjamana faaba la. A balimake Umaru Konjago y'a deme ka Jaka, Bagana ani Jaara maraw mine Manden na. Asikiya Mohamedi ka keler sera Galamu. San 1497 ka se 1498 ma, a ye mosi keler ka Naba Nasere ka mara ani Yatenga mara mine. San 1514, Asikiya Mohamedi ni Kebi masake, ka bo Kantajamana na, u jera ka hawusamaraw mine; n'o ye Katisena, Habiri, Zaniya ani Kano ye. Asikiya Mohamedi labanna ka burudamew gen ka taa Ayiri kono, ka Agadesi fara a ka jamana kan. O kelen, koroborofanga bonyana k'a damine Tekuru la ka se fo Agadesi; o tun y'a koron ni tilebin ye; ani k'a damine Noron na keneke fe, ka n'a woroduguyanfan dan bo Manden ni worodugujamana dancew fe. Manden tun be koroborofanga ka mara kono; sabula Asikiya Mohamedi tun y'a keler k'o mine. Wangara sanu tun be bo Asikiya Mohamedi ye.

San 1528, Asikiya Mohamedi cekoroba fiyenna, a denke Asikiya Musa y'a bo fanga na ka sigi a no; a yere fatura san 1538 na.

Asikiya tile la Koroborofanga soro tun sinsinnen be sen, baganmara, monni, jago ani sanubo kan. Sen tun be ke Bajolibá jurukun fe; kanari min senna ka digiw jo, olu ye senefen soro hake caya kosebe.

Koroborofanga ka sahelijamanaya y'a ke baganmarayoroba ye. Siya minnu be wele Soro, olu tun ye monnikelaw ye. Jagosira tun b'a ni Saharajamana ce. Kogo min tun be bo Tegaza ani Tawudeni, o tun ye Asikiyaw ta ye. Faamabonda ka soro jiidilan tun ye disongo, wusuru ani fen wereye.

Hadamadenya nasira la,

faamaso ka fanga tun be boli jamanaden bee kan sabula ale de kelen pewu ye dugukolotigi ye. Gerenteba tun te wulakonobaarakelaw dala, nka u tun wajibiyalen ka faamaso balo. Namakalaw tun ye numuw, gesedalaw, sojolaw ani jeliw ye. Olu tun be faamaso lahorma kono. Jonw ye faamaso ta ye; u be baara k'a ye.

Misiri ni madarasa caman jora Asikiyaw fe; Sankore jora Tumutu, dow fana jora Jene ni Gawo. kalan bee tun be ke larabukan na : kurane kalan, diine taabolo, tariku, josariyaw ani larabukan sariyasun. Donnibaa caman sorola o kono na i n'a fo Gawo Zakariya, kiiritigela fila Ahamedi Baba ni Bagayoko Mohamedi ka fara tariku karamogo Mohamedi Kati kan. Nin donnibaaba ninnu bonyanen tun don kosebe jamana kono. Dugukolo, jor, sanu ani wari tun labilalen b'u ye.

Tumutu dugu sigira san 1200 waati burudamew fe. Manden y'a mara ka teme. A ye dawula soro san 1300 ni 1400 furancew la. Manden min ye Mali ye, o cilene kofe, burudamew koseginna Tumutu ma koroborofanga labanna k'a mine olu la. O Asikiyaw tile la, Tumutu sannayelenna kosebe.

Jene sigira san 900 waati la, a ni Mandenfaama ye waati jan ke keler la, o ma se k'a mine. Soni Ali Béri tile la, ale de y'a mine san 1479 waati la. A mineni fana ma ke keler nogoman ye ale bolo. Jene ni Tumutu fila bee sangawulila san 1600 kono na. U nogonna si tun te Koroborofanga jamana kono. Sahara ni Sahili mogow nogonkunbenyoro tun ye Jene ni Tumutu ye. Asikiyaw tile la, Tumutu tun be jate faamadugu filanan ye ka fara Gawo kan.

Taari 1 soro jatedaw te kelen ye kalanbaaw bolo

Ne nisondiyalen be Bakari Danbelé ka welekan jaabi. Anw fe Ofisidinizeri kono, baaraw segesegelen te kosebe. Sabula senekela caman kalannen te. Ofisi min ka kan ka kow segesegel ka ne ka kunnafo ni lase senekelaw ni faamaw ma, a b'i n'a fo segesegeli t'o ka baara fe. Hali n'o segesegeli in b'a ka baara fe, togo duman ninini ni joyoro lafasali be a daw bali o la. San 2004 na, senekelaw ye mankanba min wuli Ofisi kono, segesegeliw jaabi kera ninnu ye :

- Ofisi ko malokaama toni 5 ni ko be soro taari kelen na; n'o ye bore 66 ye.
- Senekelaw ka lafasaliton «Segizagon» y'a jira o kofe, ko malokaama bor 34 nitila be soro taari kelen na.
- Cakeda min be wele «Sepese», o ko toni 3 ni ko be soro a la.
- Haladi mogo faamuyalen daw nanen Ofisi kono, olu y'a jira ko bor 33 be soro taari la.

Ne terike Bakari Danbelé, taari 1 soro jatedaw te kelen ye kalanbaaw bolo.

Jinan binfagalal songo damatem yelenna

Mali koori songo sigira k'a ke kilo 1 doreme 33 ye. An ye nininkali ke minenw songokola, a fora ko fen tena fara olu songo kan. An ye minenw ta n'o kan ye.

Sisan, u nana minenw songo di an ma. Any'a ye koori binfagalal min be wele sikometi, o litiri 1 songo yelenna ka ke doreme 2.400 ye; kasoro a salonnama tun be 990 na.

N'i ye fen ta ni 990 naniya ye, n'o nana ke 2400 y'o kofe; o be mogo dabali ban. O ye 1410 faralen ye a songo koro kan. An b'a nini nemogow fe, u k'a ko laje; senekelaw te se k'o sara, sabula a sara te soro forow la. Fenminye san 2005/2006 juruko ye, juru wulila mogo caman na ninan. Kerenerennya la Kilela komini dugu 14 na, «CPC» 40 de b'a kono. N'i ye Zerelani «CPC» duuru ta k'u ka san 2005/2006 kanpani kooriforo taari 639 jate min, «CPC» si t'a la min bora a ka san baara la. juru

Otuma na, ibena Kefa Kumare ka kuma sementiya ka bo Kin, Falokomini na, Bila mara la. Ale y'a jira ko lafasaliton te senekelaw la Mali kono. An be san 10 bo bi, san o san o be fo salon ka fisa ninan ye. Ofisi senekela do ka fisa ni do ye. N'o te, segen dan b'ee ye Ofisi kono na ye. I mana jisongo saracogo jatemin taari kem'e okeme, taari 25 doren jisongo be soro olu la. A to 75 b'ee jisongo be soro fen werew la : i'n'a fo baganfeere, forofeere, forow tonomadali (Iuwanzeli) ani gorogojuruw tali, ka ke ka jisongo sara.

Bakari Danbelé, i ka kuma indiyara neye. An b'ee kumayoroye Kibaru ye. Ne yere ye balikukalankaramogo ye; o temenen ko Nonon mara la, «Sanburu Lokali» nemogo dankan folo ye n ye. N ye senekelaw ka lafasaliton «Segizagon» biro kunnafonidila fanaye. Nebeninbaara ninnu sabati balikukan sababu la. Ne ma lakoli ke. An k'an wasa don an ka kanw na, ka to ka nogon kunnafo.

Ibarahima Baba Jara ka bo Surukutu (km 18 la)
Dognfiri, Nonon mara la

yelenna a b'ee la. Sabula n'i ye senekela 10 jate min, i b'a soro mogo fila doren bora a ka baara i a . Gelyaw ka ca. N'i ko senekela daw ma, u k'u ka juru tata hake ben n'u fanga ye, u b'i jaabi ko ale kelen de kunko don. Nka n'a fasayana ka se ke u bolofenw mineni ma juru tonkoro, u be soro ka wuli ni «CPC» togo ye.

Jinan koorko kanpani na, Zerelani bema taari 530 da. A fora ko tono min soro la kanpani temenen in na k'o wari ka tila senekelaw ni nogon ce kabini zuwenkalola, walasa una se ka senekura matarafa ka ne. Nka halisa senekelaw b'u niyoro makononi na. Adama Berete sekereteri «CPC» ka bo Zerelani 3, Kilela komini na Sikaso

Diya baronin

Makai be hadamadenw wele. Ne hadamadenjogon, na yan. Mogow jigi ye nogon ye, Na yan! na yan! Mogoya ka di sogomadaraka ye, A ka di tilelafana ni surofana ye. Ne hadamadenjogon, na yan. N'an k'an bolo di nogon ma. Na yan! Ne mogonjogon kanu be n na. N'an ka dugu dilan, jamana ka yiriwa.

Berema Berete ka bo Diyu, Kajolo

Faatanya be mogo donyoro caya

Faatanya be yaala dije fan tan ni naani na.

A mana mogo min soro, a b'o malo fo k'o kun suli. Faatanya ni kongo jugu de be sanga nogon ma. Jogo jugu caman be da faantan na. A be k'i n'a fo faatanya yere de ye nama ye, ka yaala a tigi nofe. Dow b'a fi ye fugari ye, dow b'a fi ye hakilintan ye.

Faatanya be mogodonyoro'n'abeyoro caya, ka mogoba ke mogonin ye. Ibalemaw n'iteriwan'ifurunjogonw be ban i la; i ka dugumogow yere t'i jate. Tige t'i bolo ko si kelen na. I muso n'i denw be tige i la sabula b'ee bolo, joyoro t'i la. Faatanya mana se mogo ma, Ala kelen 'pewu de y'i ne joyoro ye. Denkerere de ka jugu faatanya la.

Berema Bereete ka bo Diyu Kajolo

Nafigi

Nafigi nenkise ka jan n'a yerekun ye. A mana don du duman na.

A te bo k'o cibali to. A mana don dugu walima jamana duman na, A te bo k'olu cibali to. Nafigi be terimaw kodon nogon na, Ka furu dumanw sa. W'a timinan ka di, o ye timinandiya dan ye.

A te segen, a te nin, a te koro.

Basiru Fonba ka bo Beleko - jele,
Doyila mara la

Do bëna bō Namakōro musow ka gëleya la

Namakōro musow bë foli ni walenumandon ke ka nesin Denmisenninw demejekulu ma; n'a bë wele nansarakan na «Fondason puru Lawansi», ka da a kan a ye nɔsimansin di an ma. A bëna ke sababu ye ka dōbō Namakōro musow ka gëleya la.



Nankanba Jalo

Musojekulu 7 de farala njogon kan ka ke jekuluba kelen ye min bë wele Badenya. O musotōn ninnu ye : Sinsinbere, Timinandi, Ñogolōn, Dōke, Muso majiginnen, Ganatōn ani Cesabaatōtōn. Nin tōnba min ye Badenya ye, a nesinnen don musow ka gëleyaw keleni ma duw kōno ani sigidawla. Waatijan musow tun kelen don bolokofenfen ye, tōn in sigikun dō y'owuliliye. Namakōro musow bë min fō denmisenninw demejekulu ye deme kelen in kōfē, a k'a dōn Namakōro ye sigidaba ye min njogonna ka dōgo Bamako. Nka ji saniman, yeelen ani sirakogeléya b'an kan kosebē. Ntēna se ka kuma kuncé kasorōn ma badenyaton njemogoba fo a ka cesiri la. Nankanba Jalo musojekulu Dōke njemogoba don Namakōro Bamako

Nsonw bë sarimisiw foni hali duw kōno

Misisonya kelen bë kamanagan ye Baginda, Jumazana ani Zankulubali kominiw kōno. I ka misi mana taa kungo kōno walima ka tunun, i bë taa a soro nsonw y'a faga ka taa n'a sogo ye Bamako. U b'a kunkolo n'a wolo bila a fagayorō la yen ka taa n'u yere ye.

Tuma dōw la, nsonw bë taa sarimisiw foni hali duw kōno sufé, k'a faga ka taa n'a sogo ye. Segesegeli y'a jira ko mobili be nson ninnu bolo. An b'a nini lakanabaaw fē, u k'an deme an bolobaganw lakanani na

**Yiriba Jara ka bō Kokun,
Jumazana komini na Fana mara la**

Cikelaw niyōro ka d'u ma kōori tōnō na

Aw senekelaw kamana gannen bë an niyōro soro cogo la san 2005/2006 kanpanikoori feerelen tōnō na. A fōra ni kōori kera dōrōmē 32 ye, tōnō mana soro la Sēmudete fē, o dō na di senekelaw ma. Feere kera, tōnō soro la ka senekelaw niyōro dannatige a la. O tōnō in laseginni tun bilala zuwenkalo walima zuluyekalo kan. Zuwenkalo banna; zuluyekalo daminenen, kuma kura fōra an ye o tōnōko kan, an ni njemogow tun ma fara min ma kōrōlen. Mōgo caman tun nisondiyara ni wari in soro la ye u ka samiyē kura musakako la. Nka u ko wari in bëna lamara ni Sēmudete feerela san 2008, kōori sōngō mana jigin, a bë fara senekelaw ka soro ta kan ka di u ma; walima tōnō in bë tila, ka do di senekelaw ma, k'a tō bila u nesigi ye.

Nin kuma in bë mōgo kabakoya kosebē. Jamana min te ka mōgo soro, k'a ka jziniw topōtō ka ñe, jonnibë se ka da a la, k'o bëna mōgo soro ka cikelaw ka wari lamara ka ñe san 3 kōno?

An b'a nini njemogow fē, u ka senekelaw ka wari di u ma.

Numuke min ma desē ka nege kuru

k'a dun, o tēna se kka desē nege tigeli la k'a dun. Wariko in tōnsigi kera dabalibanko ye. Sabula a tilekelenkarila mōgo 68 walima 70 fē; kasorō tōnden kuuru bë mōgo ba kēmē ni kō bō. Mōgo caman ma bō a kalama. Ni nin kera bëejefanga taacogo ye, a bë ke cikelaw de la. Nka mōgo bë se k'a fō Sēmudete walima goferenaman sen te nin ko in na, n'u y'an cikelaw deme an k'an ka wari soro. Cikelaw yerew ka lafasalitonw nō b'a ko la. An b'a nini u ka nin wari in di an ma; o kōfē u na feere were siri wari were soro cogo la. An ka njemogoba de y'a fō wari in bë di an ma. O ma teme kalo damado kan, n'a fōra o dili ma bō, jigilatigēko dan y'o ye. O te njemogō baara ye. Njemogō delila k'a jira k'olu te se ka segin k'a fō cikelaw ye, ko kōri bora 42 la ka ke 38 ye; sabula ko kuma fila foli bë mōgō tige njogon na.

- Jakarija Tarawele ka bō Bangumanawere la
- Madu Male ka bō Kōnbere
- Dirisa Male ka bō Farakala I
- Salifu Jire ka bō Ñolokuma I, Bilara la.

An kana faamaw tōgō tīne ko bëe la

Sanw temena, Kibaru tun bë bō kalo saba o kalo saba. Nka sisani a kera kalo o kalo ye; kunnafoni caman b'a kōno fana. An minnu ma kalan were ke balikukalan kō, an k'a to an hakili la ko : tuma bëe la Ba i ni ce, i ni baara; o y'a soro a bë baara de la. Nka ni Ba kōrla don min na, a fana ka kan k'a fō : n den, i ni ce, i ni baara.

O kōro ye mun ye! Tuma bëe la an b'a fō ko faamaw te balikukalan jate. Ne kōni bolo, u b'a jate. An senekelaw bë ko caman ke an ka

duguw kōno, n'an y'o musaka dōw don kalan dafé, o ka fisa njenaje dōw ye de!

Ni faamaw t'a jate, an tun tēna Kibaru soro a cogo la.

Bakari Danbelé
Kabini san 1972, balikukalan bë Mali kōno; Kibaru b'a la ka bō. O tuma na, an kana faamaw tōgō tīne ko bëe la. An yere k'an jilaja sa!

Faamaw ye dō ke a la, an fana k'an jyōcō fin.

**Bakari Danbelé ka bō
Sikaso Wayerema 2 la**



Dukene 26nan : Furumuso juman ninicogo

Fɔlo, furumuso tun ye du ka forobamuso ye, nka sisan a kelen be mɔgɔnin kelen muso ye. Mɔgɔkɔrbaw ka kɔlɔsili la, dubako finc taara kaban. Waatiw temena, jate caman tun be minɛ muso furuli la, cogo min na a be se ka ke duba sigili matarafabaa ye. A be dabo o muso furuta ka ke muso laadiri ye mɔgɔkɔrbaw bolo, min be se ka degun ku furuso kɔnɔ. Muso ka senyerela tun nininen don kosebe a jogo juman tɔw la.

Cew ka jatemine tun be boli fen caman kan u furupinito. Nka, o jatemine ni sisan taw te kelen ye; sabula cew b'a la ka yelema dɔɔnin-dɔɔnin.

Dijenatige baaraw nogoyafeere minnu bɔlen be ka caya, olu kelen be ka mɔgɔ hakili yelema. O netaasira ninnu be ka lafiya na sigidaw la. Fen do keli tun ka gelen fɔlo, sisan o nogoyara mɔgo, du ani dugu yere bolo.

Muso furuli tamasiyenw be tali ke musofurula yere ka nɛnamaya cogoya la. O jatemine ninnu be senna o te biko ye. Furu minɛcogo sariyaw, ce sago don a muso ka ke mɔgo suguya min ye k'a deme dijenatige geleyaw latemecogo la. O siratige la, cew, musow, denmisew, mɔgɔkɔrbaw ani diine nedonbaaw bee bennendona kan, ko muso furuli jatemine be tali ke dijenatige taabolo la..

Bahawa Dunbiya ye musokɔrɔba ye, min si hake be san 73 la. Ale y'a jira ko lawale la, ce tun t'a yere furumuso jira. A mansaw dɔɔn de tun yamarulen be n'o ye. Olu tun be mɛen ka musofuruta jatemine kosebe a ka mɔgɔya cogoya ania hakiliyanfan na. O kun ye muso furuli kana ke nimisako y'u bolo furu donnen kɔfɛ. Sabula furu ye fenba ye, mɔgɔ ka kan k'a jatemine ni hakili ye, walasa a be se ka ke ko kuntaala jan ye here kɔnɔ. O de koson, ni mansa bɛna muso furu a den ye, a be kɔlɔsimine k'o ladamucogo n'o siya la. Fen min yere tun be segesegfurula fɔlo, otun ye muso ka hɔrɔnya walima a ka namakalaya sidɔnni ye. U tun b'a geleya fana tere jugu kana ye muso

la min ye geleya ye furu kɔnɔ. O tere fanba tun be tali ke muso farikolo fandɔw bɔcogo la.

Sidi Kanta ye silamediine nedonbaa ye. Ale y'a jira ko furuko la silameya sariyaw ni laadalataw te nɔgon je kosebe. Nka fen min ye terekoye, a y'a jira ko silamediine ka jate t'o kan. Sabula ko terekoye be muso bali a ka hake la hadamadenya kɔnɔ. Silame bolo, musomannin ladamucogo de ka kan ka ke furukela sinsinyɔrɔ ye, ka d'a kan a ma daga ce ni muso ka kafonjɔgɔnya ke ni furu te. Sidi Kanta ka fo la, ni musomannin npogotigiya tara kasɔrɔ a ma furu, furu ma daga a ye dije na tuguni.

Mɔgɔkɔrɔba caman y'a jira ko danfaraba be fɔlo musofurucogo ni sisan ta ce. Sabula cew ka sira te terekoye bilen. Tuma caman na, ubɛ waati jan ke kanu na. O dɔw be laban furu la kasɔrɔ u mansaw da ma don a la. Bahawa Dunbiya ka fo la, i tun t'o waleya men i tulo la lawale la. Bi, denmuso kera jagokun ye. A te labila ce ye wariba te min kun. Ko minnu jate tun be minɛ furu sabatili la, olu be bilala bolo kɔfɛ. Terekoye b'a la mɔgo bolo tuguni. Furu yere bilama kelen be min ka fisa furunjɔgɔn walima denmansaw ma.

Aminata Ture ye kalanden ye Mali

kalansoba «FLASH» la. Ale ka miiri la, fe de nɔgon te furuko la. Cs ka kan ka muso furu, a be min fe. O kalanso kelen in na, Aminata Ture terimus y'a jira k'ale ka sira te namakalako ni siyakola. Nicɛ min b'ale fe, n'alefana b'o fe, o ye furu duman y'ale bolo. Sabula, a ko furu ye i si ni n si ko ye. Fe man kan ka bila kɔfɛ o la.

On'a ta bɛe, folokow ma sebekɔrɔ fili kerefe; sabula Bahawa Dunbiya ka jatemine na, bi furukela caman sago don, u ka furumusow ka ke muso ladamuko jumanw ye. Fuseyini Jabate min ye kalanden ye «FLASH» la, alefana hamiy'oye; sabula ale y'a jira k'a te sama muso farikolo cene nofɛ, fo a joga juman. Ay'ajira tuguni, ko mušo minnu be fini suturabaliw don kalanyɔrɔ ni bɔlɔnw kɔnɔ, olu ko man di ale ye. O ye ladamucogo jugu tamaseere dɔye. Musomannin minnu fenko ka bon, a t'olu fana fe; sabula k'olu be sɔn ka laban yere kunfeere la.

Ayisata Kone min ye farilajeyatuluw feerebaa ye, ale ka fo la, bi cew furukela te. Fosi man di u ye muso janjigiy nɔfɛyaala kɔ. U sago don ka dije muso yeko juman b'ee k'u kanukɛnɔgɔn ye, kasɔrɔ, furu dusut'u la.

Madiba Keyita
Dokala Yusufu Jara

Kalankene 42nan : Mali jɔnjɔn (darapo)

Jɔnjɔnye jamana taamasiyen n'a Jɔnjɔnye. A bonyalin n'a lakanani ye wajibi ye jamanaden b'ee kan. A mana yankan yɔrɔ o yɔrɔ la, k'a siri fən ofen na walima k'a nɔrɔ, o ye faso ta ye walima faso be kene kan yen. Jɔnjɔn bonyabaga fɔlɔw n'a lakanabaga fɔlɔw ye jamanakuntigi, depitew, goferenaman, laramɛ, ani mɛriw ye. Ni maliden min ma dɛsɛ; i ka kan ka Mali jɔnjɔn kɔrɔ n'a cogoya b'ee don ka se k'u nɛfɔ mɔgo wɛre ye. L a k o l i k a r a m o g o w , m a d a r a s a k a r a m o g o w , b a l i k u k a l a n k a r a m o g o w , duguyiriwakalansokaramogow b'ee ka kan ka se Mali jɔnjɔn fasa dacogo la k'a don jɔnjɔn ye mun ye jamana kɔnɔ, a joyɔrɔ ania neci. Ñe saba be Mali jɔnjɔn na. U kelen-

kelen b'ee n'a kɔrɔ don.

1 - Nuguji : be sene kofo, jiriw ani binw, dunkafa ka sabati.

2 - Nɛremugu : be sanu kofo, jamana nafolomafenw, sɔrɔ yiriwali kama,

3 - Bilenman : be hakilililajigin ke fasodenw joli bɔnni na fasokumabo keneb kan.

Jɔnjɔn bonyali

1 - Jɔnjɔn te tulonkefen ye. Mɔgo man kan k'a ke masiri ye i la manamanakow la.

2 - Ni jɔnjɔn be layelen, n'a be lajigin, mɔgo o mɔgo be kene kan, mɔgo o mɔgo mana ben n'o ye, i ka kan k'i jo kelewu ka foli bila a ma.

3 - Jɔnjɔn ka kan ka siri ka nɛ, walima k'a mine ka nɛ, n'a be mɔgo bolo. Ayɔrosimankaka seduguma, kuma te ka bin.

Yelema bëna don senekekélaw baarakécogo la ni senekekemansin kura nanenw ye



Senekekemansin 300 folo nanenw

Jamaana njemogow ni senekekuntigw sebekorò bora alamisadon zuwenkalo tile 29 san 2006, ka senekekemansin 300 bisimila senekekélaw tògo la. A kera Samanko, Bamako dafedugu do la. Senekekemansinyélényorò kura bëna sigi yen fana.

A bëna ke sababu ye ka do fara senekekélaw ka soro kan, n'u kafora nogon kan jekuluw ye.

Nin senekekemansin 300 soroën be Mali ka mansin kuuru dafa 1294 na. O la «CDEAO» kono, Mali be joyoro filananna senekekemansinkola, ka tugu Nizeriya la. Nizeriya ta ye 1600 ye. Gana be da Mali kan ni 1200 ye Kôdiwari y'u naaninan ye ni senekekemansin 1000 ye.

Sene minisiri Seyidu Tarawele ka fo la, Mali ka mansin sannenw na yéremahorónya talen ni bi ce, këmesarada la 40 sorojamanakuntigi Amadu Tumani Ture ka fanga san 4 kono. Mansin 743 de be baara la sisani olu la.

Senekekemansin kelenna fanga ye soke 50 fo 75 fanga hake ye; u be bulukuli, körösiyenni, danni, nogodon, ntugunwuli, malokan ani

sumankisèdoni ke. Manabulu fana be se ka don u la ka ji sama ka sɔnni ke. K'a damine san 2002 la ka se ninan ma, këmesarada la Mali ka baarakénafolo 9 fo 15 be taa sene dafé.

Mali senekeso njemogoba Bakari Togola y'a jira kose senekekemansin pinnu tèna ni mogòla. U juru be don mogòla, min be se k'a sara. O de koson senekekélaw ka njemogoba b'a nini nin senekekemansin 300 min ditò file nin ye, u tabaaw ka lahidu bò a sira fe walasa senekela wérèw ka bò unu ma, min b'a to dunkafa be se ka sabati Mali kono.

Mali senekekemansinyélényorò kura min bëna sigi, o be se ka mansin 8 fo 12 yelen tile kono. Mogò 40 hake bolo bëna don o baara la. Endujamana bolomako ye nin baara in ye. A bëna laban ka kuranko sabati Mali ni Kôdiwari ni nogon ce, ani ka terenkunkolow ni wagònw di Mali ma yanni san 2006 in okutoburukalo ka se, walasa ka Taransirayi ka mogota nogoya. Jamanakuntigi ka kuma laban na, a y'a jira ko senekekemansin 95 wérè be sira la ka na zuluyekalo in na.

**Moriba Kulubali
Dokala Yusufu Jara**

Lotoliw be ka jo wuluw ni jakumaw ye Lamerikenjamana na

Lamerikenjamana na, lotoliw be mogow tògo la cogo min na, u be wuluw ni jakumaw fana tògo la o cogo la. San 2006 in zuluyekalo cemance la, lotoli Peterisimari dayelela Wasingintoni faamakin do la; min be wele Betesida. Wulu walima kajuma su kelen y'o kono sefawari 2.484 ye Lotoli in na, fén caman be wulumarasodennin ninnu kono. U ni "lawale wulumarayorò te kelen ye. A dòw yere be yen telewison b'olu kono; nka olu su kelen ye sefawari 7.564 ye. Wensi Malanafi min ye lotoli in n'a sugufiye njemogoba ye, o y'a jira k'u be tilen ke sinimanbo la bagan ninnu ye; sabula a caman delilen b'o la u kà so.

Wulutigw ni jakumatigw be tile kuuru kaara ke taakasegin na siyoro mamineni na u bolobaganw ye.

Peterimari ye jamakulu ye, min mogow faamuyalenba don wuluw ni jakumaw ka baloko la; o de koson a san 3 ye ninan ye, u b'a la ka lotoliw jo u tògo la.

Baara be ka yiriwa u bolo kosebe. Lotoli 30 nogonna de b'u bolo folo u ka jamana na, nka yanni san 2010 ce, u sago don k'a dafa 240 na. Nin kunnafo in minena Burisi Irisarisoni na, ale ye Peterimari jekulu ka kumalesela ye. U ka lotoli min be Arizona, Lamerikenjamana woroduguyanfan fe ka digi tilebin kan, ale b'o kunna.

Lotoli Peterimari be se ka wulu 180 ani jakuma 26 bisimila nogon fe. Lamerikenjamana be sefawari miliyari ba 21 ani 600 don wuluw ni jakumaw ka musakaw dafe san o san. Ani ka sefawari miliyari ba 25 ani 920 don dentulonkelanw na u ka denmisenninw ye. A be hake min don munnituluw ni wérininv ni kalew la, o fana be se sefawari miliyari ba 9 ani 180 ma. Dokala Yusufu Jara

Nōriwēzijamana césirilen don Farafinna kanw yiriwali fē

K'a ta zuwenkalo tile 16 la, ka se a tile 25 ma, Mali kalanko Minisiri, ka fara nininikela mōgo kōnōtōn kan fasokanw na, olu welela Nōriwēzijamana kalansoba nēmōgōw fē, lajeba la, min bolila Farafinna kanw kalanniko kan an ka kalansow la. Farafinjamana na, Mali dōrōn tun te kene kan. Kankodōnniya tigilamōgōw nana ka bō Afirikidisidi, Ecopi, Tanzani, Madagasikari ani Keniya. Dōw nana ka bō dijē fan wērē, i n'a fo Lamerikenjamana, Holandi, Panama, Faransi, Beliziki, Japon, Suwēdi, Danemariki ani Banisirayila.

Tile naani de kera lajeba in na. A kera kunnafonifalen dan ye jamanaw ni nōgōn ce kanko ni kalanko la ani nininikelaw ni nōgōn ce. Mali kalanko Minisiri Mamadu Lamini Tarawele ye kuma ta, ka Mali ka baaraw, a ka fērēw, a ka sew n'a ka gēleyaw fō fasokanw yiriwali nasira la. A y'a jira ko Mali ye sira min minē fasokanw yiriwali la, sira in siñena ni hakili ye, ka

sifileli ni jateminē caman ke, min b'a to, dōnniya bē forobaya, kalanko bē sabati, sōro ani demokarasi bē yiriwa. Farafinna kōnō, bonya dara Mali kalanko Minisiri kelen de kan, a ka na fēn fō Mali ka cēsiri kan, fasokanw yiriwali kunkan, fadenkēne kan. Mali nininikelaw fana ye laseli dōw ke : U kumana kunnafonisēbenw kan minnu sēbennēn don fasokanw na. U kumana kalan kēcogo fērēw kan fasokanw na, a gēleyaw ani munna Mali ye tubabukan siginidenw sugandi fasokanw sēbenni na. Nininikelaw ka kumaw bolila bamanankan maben kōnōkow fana kan ani gafe minnu sēbenna fasokanw na Mali kōnō. U ma dan o ma; poyisēbenna minnu bē Mali kōnō, k'a ta san 1961, fo ka na sē bi ma; minnu ye poyigafew sēben, minnu y'u ta sēben kalanje gafew kōnō, minnu y'u ta sēben kibaru kōnō o bēs fōra dijē mōgōw k'a men, K'u nafaw jira, hadamadenya, seko ni dōnko ani sōro taabolow la. Mali ka cidenw jatigi tun ye

Madamu Ingise Esikatumu ye, Nōriwēzi kalansoba karamōgo dō don. Ale sababuya la, Nōriwēzijamana y'i jo ni bamanankan maben nēbilagafe n'a maben yērē-yērē labenni baara musakaw ye. San duuru kera o baaraw la Mali ani Faransi «INALCO» nininikelaw fē kanko la. O gafe in bēna jēsen jamana kōnō, a tēna mēn. A kera sababu numan ye ka lakōlidenkōrōba dōw ani lakōlikaramōgo dōw ka kalan musaka bēs ta, u ka sannajēlen ka sabati.

Nōriwēzijamana k'a jo Farafinna kanw jigi kōrō, tīnē yērē la, o ka kan ka mōgo kabakoya. bawo Nōriwēzi bē dijē dan na; u n'an ka jan nōgōn na. Ni Faransi walima Angilejamana de tun ye nin baara in ke, o tun man kan ka bali mōgo la, bawo olu de y'an mara, k'u ka kanw daga sigi an dala, ka fasokanw tereke duguma.

An selen Nōriwēzi, k'u ka jamana faaba Osilo yaala, ka sigi ka baro ke ani dumuni u ka karamōgōw fē, u ka kalandenw ani Maliden minnu sigilen bē yen, an ye faamuya caman sōro. An y'a sōro Nōriwēzi ye sōrōbaatōjamana ye, a yiriwalel don. Hadamadenw ka bēn k'u tēgē di nōgōn ma sigikafō ni daamu kadara kōnō seko ni dōnko nasiraw ani sōro yiriwali la, an y'a sōro o jamana don. Siyawolomajamana tē, balawujamana tē. Sariyajamana don, wa demokarasijamana don. Masake de b'u kunna, peresidan tē yen, nka a ka baasi tē se mōgo si ma, dugulen fara dunan kan. N'o jamana suguya ye Farafinna dēmē kalanko ni kanko la, ka nafolo caman don o dafé, o man kan ka bali mōgo la.

Jamana minnu bē ka Mali dēmē su ni tile walasa fasokanw bē yiriwa, kalanko ka sabati, Nōriwēzijamana bē jate olu fē, siga si t'o la.

Mahamadu Konta

Gafesēben baara fila kera Segu zuluyekalo la

Baaraba fila kera Segu ka nēsin balikukalansow ani duguyiriwalikalansow ma Zuluyekalo la san 2006, .

Kalo kelen kera gafesēben na bamanankanna, mōgo faamuyalenw fē minnu bōra fasokanw yiriwali cakēdaw la, ani lakōlikaramōgo mōnen dōw, ka bō jamana fan tan ni naani fē. Cakēda kelen de ye nin baara fila ninnu labēn, n'o ye «CNR-ENF» ye : Balikukalan ni duguyiriwalikalansow baarada.

Baara fōlo lajini ye, ka balikukalangafe dilan dōgōsō (kaadōkan) soninke ani kasonkakan na. O baara kuncera jumadon zuluyekalo tile 28.

Baara min bolila

duguyiriwalikalanso kow kan; ofānini ye ka segin duguyiriwalikalanso gafew kan, k'u kalan, k'u filiw latilen, k'u jiidi. Nka kalangafe dōw bē yen i n'a fo farikolon ni farikolonenaje taw olu dilanna kura ye bawo olu fosi tun tē yen.

Nin ye jamana nēmōgōw n'u dēmēbagaw ka hakilila n'u ka baaraw ye minnu bēna ke sababu numan ye ka ni kura don balikukalan ni duguyiriwalikalanso na. San nataw la, balikukalangafe bē labēn bozokan, Siyenara (sinafōkan) ani marara la (miyankakan). Duguyiriwalikalangafe bēs fana ma se ka laku rayā kalo kelen in kōnō. A to bē labaara siñē wērē.

Mahamadu Konta

Maliden dōw minēna wari yuruguyuruguboli la Faransi ni Mali ce

Lakanabaaw ye mogo 25 minē Pari n'a lamini na. A fanba ye du kelen mogow ye. U tun be ka banki do sigi u yere ye sariya kōkan. K'a damine san 2000 la ka se u mincwaati ma, u ye sefawari miliyon 262.000.000 labo Faransi ka don n'o ye Mali kōno.

Mogo 17 latemena u la sariya ka bolo kan Pari nafoloko soba la. Olu nemogo ye Maliden ye, a si hake be san 50 la; ale de bilala a fa no na u ka banki in nemogoya la. U y'ale datugu.

A tōw bilalen be fōlo sanni sariya mako ka jo u la; nka jen te ke n'a ye u do ka bō Faransi jamana dafe.

Lakanabaaw ye jiginni min ke. Malidenw ka cakayorow la, o sera k'a to u k'u tēge da u ka yuruguyurugubanki in jatebokayew kan.

Cakeda min nesinnen don dantemekow nangili ma nafoloko sira fe, n'o ye «OCRGDF» ye, o ka sēgesēgeli y'a jira ko banki in sigira sen kan san 2000 waati la; bankiko ye tīne ye, wa siga t'a la, a tun be k'a ka baara ke.

Jamakulu min don, Maliden minnu be faransisigi la, dōw be yaala ka wari minē olu bolo. Banki in tun be baara la cogoya fila kan. Malidenw b'u ka wari di banki ka waridalajela ma, o k'a lase u ka mogow ma Mali la; o mana ke wari hake o hake ye. Wariw mana kafo nōgon kan kaban, u be don banki mogow wew bolo minnu ka Faransisigi sēbenw dafalen don, n'u be se ka pakurun ta ka n'u makow cōnab Malí la ka segin. O senfe, u be wari in lase u tigw ma. Tuma caman na, nafoloko lakanabaaw, n'o ye «duwani» ye, o te ladonniya fosi la. Malidenw

fana be se ka juru ta banki in fe, nka a be sara ni tōnō min ye, banki minnu be baara ke sariya kōno, o ka dōgō n'olu ka tōnō data ye juru kan.

Baara in kēcogo numan a tigw fe, o sera ka lafiya don wari lasecogo la Mali kōno. Sabula u be degun caman sōrō Mali bankiw bolo u ka wari sōrōli la. O de koson u ye sira wēre nini u yere ye o banki ninnu ka baara kēcogo jugu fe. O gelya caman ye wari laseli musaka caya ani Ero falencogo sefa la.

Mogo minēnen ninnu tun b'a la ka balo nin cogo la u ka baaraw tōnō na, kasōrō a yamaruya t'u bolo. A dōw y'a jira k'olu tun be se ka sefawari miliyon 2 ani 124.000 sōrō kalo o-kalo. U nemogoba ka fo la, ka baaraw t'u tan ni fila fili la, u tun be se ka sefawari miliyon 131 lase Mali la dōgōkun kōno.

Dokala Yusufu Jara

Sēnekela do y'a muso luwe a ka patōron ma sefawari 17.500 kalo la

Endujamana na, kunnafonidiseben do y'a jira ko yen faantanw b'u musow luwe walima k'u denmusow feere setigw ma. A kōlsira ko Enduw fe yen, cew ka ca ni musow ye kosebe.

Sēnekela do y'a muso luwe a ka patōron ma sefawari 17.500 kalo la. Den saba yere be muso in bolo. Musodēsē fe, faantanw b'u siri tugosilanw (kōkiseriw) la, olu k'u deme k'u denmusow feere Gujara cew ma. Gujara be Endujamana tilebinyanfan fe, setigw don.

Kunnafonidiseben in ka fo la, tugosila ninnu be se ka sefawari miliyon 2 ani 37.500 sōrō kalo kōno u k'o baara in tōnō ye. Endujamana na, mogow hake jateminé min kera san 2001, a kōlsira ko muso 921 de be ce 1000 tōtō la Gujara mara la. Jamana in mogow te sōn denmuso sōrōli ma, sabula a furuli musaka ka ca. Ajirala k'omusakababo in ka dabila furu la a be san 20 bō bi, nka halisa a selen te ka dabila sigida la.

Dokala Yusufu Jara

Tulon

Nin ja fila dilanbaga y'a dabo a kama ka fili 10 k'u la. A y'olu nini




1. Darapo negeuw 2. Fugula finman 3. Jisnawerit sen 4. Kiniñfeso 5. Kiniñfeso bolio 6. Duljikiba bolio, numan te 7. Fidjwo, kiniñ te 8. Kiniñfeso kiniñbolio 9. Duljikiba kandia, numan te 10. Jirribulju jukcrja, numan fe.

Jaabi

Zan Faransuwa Zodari kera Samataségew degelikaramogo kura ye

Sisan mogobesek'a fo Zan Faransuwa Zodari kera Samataségew degelikaramogo kura ye. A y'a tegeno bila a ka degelikaramogoya baarakésében na Mali sennantolatantonba nemogosola Salifu Keyita Domengo ani Malamini Kone ka ciden Arasseli Dekan nena. Zan Faransuwa Zodari y'a jira ko n'a ma se ka Samataségew lase Kani 2008 kene kan, a ni Mali ntolatan nemogow be yafa di nognon ma. Nka n'a sera k'u lase o ma, a sago don ka teme n'u degelikaramogoya baara ye fo san 2010. Ay'a jira tuguni k'a bëna a sinsin maliden degelikaramogo tow kan a demejogonw tali la ka fara a kan. O de kosona ye Amadu Pate Jalo k'a filanan ye. Zan Faransuwa Zodari ka fo la, «Neye Malini Maroku kateriyantolatan Iaje Kolonbu. N kelen k'a dòn Samataségew be dabolo numan kan, n'y'a naniya ka Amadu Pate Jalo fara n kan. O bëna baara noggoya n bolo sabula ne te Mali ntolatanna bee dòn». Walasa Zan Faransuwa Zodari ka se ka baara ke lafiya la, Malamini Kone y'a jira k'ale b'a jo n'a ka sara kuuru kaara ye. Malamini Kone ye muso min bila ka na a nöna degelikaramogo kura ka baarakésében tegenobilali la, o ye kunnafoni in da jama tulo kan. Nka a



Zan Faransuwa Zodari

ka sara hake ma fo jama ye. Zan Faransuwa Zodari jirako fôlô min kera Malidenw na nin ye a ka baara hukumu kono, a dalakuma ye jigiw sigi fôlô; ka da a yere naniya kan. An b'a nini Ala fe tubabu degelikaramogo in hakililaw ka sabati an bolo. Maliden minnu'y'a baarakéjogonwye, olukana na geleya fosi bila a senna. Ni baarakéjogonw ma geleya don Zan Faransuwa Zodari senkoro, fosi têna a bali ka kunkorota soro ni Samataségew ye.

Modibo Nama Tarawele
Dokala Yusufu Jara

Jamana minnu ye Kupudimondi ta

Uruguwe san 1930 : Uruguwe - Arazantini : 4 - 2

Itali san 1934 : Itali - Cegosilowaki : 2 - 1 (mœnobo kônna na)

Faransi san 1938 : Itali - Hongiri : 4 - 2

Berezili san 1950 : Uruguwe - Berezili : 2 - 1

Suwisi san 1954 : Alimanji Federali - Hongiri : 3 - 2

Suyedi san 1958 : Berezili - Suyedi : 5 - 2

Sili san 1962 : Berezili - Cegosilowaki : 3 - 1

Angileteri san 1966 : Angileteri - Alimanji Federali : 4 - 2 (mœnobo kônna na)

Mekisiki san 1970 : Berezili - Itali : 4 - 1

Alimanni Federali san 1974 : Alimanni Federali - Peyiba : 2 - 1

Arizantini san 1978 : Arizantini - Peyiba : 3 - 1 (mœnobo kônna na)

Esipani san 1982 : Itali - Alimanji Federali : 3 - 1

Mekisiki san 1986 : Arizantini - Alimanji Federali : 3 - 2

Itali san 1990 : Alimanji Federali - Arizantini : 1 - 0

Etazuni san 1994 : Berezili - Itali : 0 - 0 mœnobo kofe (3 ni 2)

Faransi san 1998 : Faransi - Berezili : 3 - 0

Japon ni Koredisidi san 2002 : Berezili Alimanji : 2 - 0

Alimanji san 2006 : Itali - Faransi : 1 - 1 mœnobo kofe (5 ni 3)

Afirikidisidi ye kupudimondi 2010 kalamené ta

San 2010 kupudimondi laamasiyenba jirayorola jumadon zuluyekalo tile 7

Afiridisidijamanakuntigi Tabu NBeki y'a jira k'uka jamana bëna se k'a joyoro fa wariko ni minenko la kupudimondi 2010 na. Nin bëna k'a siñe fôlô ye kupudimondi ntolatanw ka ke Faraffinna. Afirikidisidijamanakuntigut b'okenc kan. A y'a jira ko Afirikidisidi mogofaamuyalenbaw tun be Alimanji, ka hakilila dôw soro san 2006 in ta kan.

FIFA yere y'a jira k'a dalen be Afirikidisidi la kupudimondi 2010 labenni na, hali nikunnafonseben dôw ye siga don o la. Sabula o kunnafonisébenw bolo, ntolatan keyoro nénama te Afirikidisidi ani k'a bolifew körolen don. A jirala fana Afirikidisidi kunnafonisében «Arapori» fe, ko FIFA nemogow b'a la ka feere siri kupudimondi 2010 lateménina Ositarali ma, ni Afirikidisidi ma se k'a labenni saratiw dafa. O kunnafoni jugu ninnu tun ye dusumakasaya dɔɔnin lase kupudimondi 2010 labenjekulu mogow ma. O hukumu kono Danni Zorodani min ye kolabenjekulu in nemogoba ye, o y'a jira ko kupudimondi 2010 keli diñe fan were fe ni Farafinna te, o te ko sèbe ye, wa kunkorota fana te.

«AMAP» kuniti
Solomani Daral
Mali kanw kunnafoni seben
baarada kuniti
Danze Samal
Kibaru
BP : 24 Telefon : 221-25-10
Kibaru Bugutiyé Bosola
Bamako - Mali
Sebenniekulu
Mahamadu Konta, Dokala
Yusufu Jara
Ladi Guinjoro, Kibaru Gatedjan
baarada
Bolen hake 16 000